

Vlada FBiH
Hamdije Čemerlića 2
71 000 Sarajevo

Sarajevo, 19. maj 2026. godine

Predmet: Opomena pred pokretanje postupaka za zaštitu prava

Poštovani,

obraćamo Vam se u svojstvu opunomoćenika društva "H&P" d.o.o. Zvornik sa registarskim sjedištem na adresi Karakaj 105-e, Karakaj, Zvornik, MBS / Reg. uložak 59-01-0064-23, MB 11238688, JIB 4405075070009 („H&P“) koje je većinski vlasnik društva Nova Željezara Zenica d.o.o. sa registarskim sjedištem ulica Bulevar Kralja Tvrtka I broj 17, Zenica, MBS 43-01-0364-09, JIB 4218019500004 („Nova Željezara“), povodom Prijedloga Zakona o postupku vanredne uprave u privrednom društvu Nova Željezara d.o.o. Zenica od posebnog sistemskog značaja za Federaciju Bosne i Hercegovine („Prijedlog Zakona“), a kojeg je Vlada FBiH u tajnosti, bez prethodnih konsultacija, usvojila 14. maja 2026. godine i istog dana dana prosljedila Parlamentu FBiH, na usvajanje po hitnom postupku.

Smatramo pravnom obavezom, u potpunosti i bez iznimke, koristiti sve raspoložive pravne instrumente, uključujući instrumente domaćeg i međunarodnog prava, kako bismo zaštitili prava i interese H&P-a od nezakonitog, neustavnog, diskriminatornog i štetnog djelovanja Vlade FBiH.

Prijedlog Zakona predstavlja flagrantno i grubo kršenje ustavnih prava zajamčenih Ustavom Federacije Bosne i Hercegovine, Ustavom Bosne i Hercegovine, Evropskom konvencijom o zaštiti ljudskih prava i osnovnih sloboda („Evropska konvencija“), kao i niza imperativnih zakonskih normi pozitivnog prava primjenjivog u Bosni i Hercegovini.

Prijedlog Zakona, u svojoj suštini i pravnim učincima, predstavlja prikrivenu nacionalizaciju i eksproprijaciju privatne imovine, kojom se društvo H&P kao većinski vlasnik Nove Željezare lišava prava na imovinu, upravljačkih prava i kontrole nad privrednim subjektom u koji je uložio kapital i za koji snosi teret vlasničke odgovornosti. Ovo pravo je zajamčeno Protokolom br. 1 uz Evropsku konvenciju koji brani oduzimanje imovine bez zakonskog osnova i pravičnog obještećenja, Ustavom Bosne i Hercegovine koji garantuje pravo na imovinu, slobodu kretanja roba, usluga i kapitala te jednakost pred zakonom te Ustavom FBiH.

Vlada FBiH nije ovlaštena, ni na osnovu jednog pravnog propisa, da retroaktivnim zakonom i bez pravičnog obještećenja oduzme ili suštinski onemogući ostvarivanje vlasničkih prava privatnog investitora, pa svaki takav akt predstavlja direktno kršenje Ustava i Evropske konvencije za što Vlada FBiH, odnosno Federacija BiH snosi punu pravnu odgovornost.

Vlada FBiH nastupa u ovom predmetu u dvostrukoj ulozi: kao manjinski vlasnik Nove Željezare i kao vlast. Ova kombinacija uloga je u konkretnom slučaju zloupotrijebljena u najtežoj mogućoj mjeri. Vlada FBiH je u svojstvu manjinskog vlasnika bila dužna postupati savjesno i lojalno, u skladu s interesima Društva i njegovih vlasnika. Umjesto toga, Vlada FBiH je tokom najmanje četiri prethodne godine primala finansijske izvještaje Nove Željezare koji su jasno ukazivali na katastrofalno ekonomsko i operativno stanje Društva, ali se na te informacije nije

Bosna i Hercegovina
Federacija Bosne i Hercegovine
SLUŽBA ZA ZAJEDNIČKE POSLOVE ORGANA I TIJELA
FEDERACIJE BOSNE I HERCEGOVINE
SARAJEVO

PRIMLJENO: 19-05-2026			
Organizaciona jedinica	Klasifikaciona oznaka	Redni broj	Broj priloga
			07

na adekvatan, odnosno bilo kakav način odazvala. U trenutku kada se mijenjala vlasnička struktura Društva, Vlada FBiH je imala pravo preče kupnje, kojim se nije koristila, što je zakonski i definitivan izraz volje Vlade FBiH da ne preuzme kontrolu nad Društvom tržišnim putem. Tek sada, nakon promjene vlasničke strukture, Vlada FBiH se vještački pokušava nametnuti kao spasilac Nove Željezare, i to koristeći zakonodavni mehanizam koji do sada nije bio poznat bosanskohercegovačkoj jurisprudenciji, umjesto da nastavi voditi pregovore o kupovini Nove Željezare koje je započela u proteklom mjesecu i onda ih naprasno prekinula. Ovakvo postupanje nije spašavanje Nove Željezare - to je preotimanje kontrole nad privrednim subjektom od većinskog privatnog vlasnika, učinjeno instrumentalizacijom zakonodavne vlasti u svrhu koja ne odgovara nijednom legitimnom javnom interesu, a koja se svodi isključivo na vještačko održavanje zaposlenosti u roku od idućih šest do dvanaest mjeseci, bez ikakvog dugoročnog plana očuvanja integralne proizvodnje i na štetu imovine i prava većinskog vlasnika.

Posebno skrećemo pažnju na očiglednu kampanju zloupotrebe pravosudnog sistema. Naime, društvo Energoinvest d.d. – Sarajevo, koje je ovlašteno od strane Vlade FBiH da vodi pregovore o kupovini Nove Željezare d.o.o. Zenica je Kantonalnom tužilaštvu Zeničko-dobojskog kantona uputilo dopis, koji ima karakter krivične prijave, u kojem navodi da Nova Željezara planira prekinuti korištenje gasa na način da će MRS (gasni ventili) biti stavljeni u zatvoreni status, a kojim bi se postupanjem došlo do gašenja tzv. miksera i čeličane, nakon čega je za postupak ponovne uspostave integralnog proizvodnog procesa neophodno cca. 3 mjeseca, te bi se van funkcije gasnog ventila onemogućio dotok gasa firmi Dobojuputevi d.d. Doboju Jug, ali i Toplani Zenica što ima karakter krivičnog djela terorizma(?!), iako svjesno zanemaruje činjenicu da ni u jednom trenutku nije ugroženo poslovanje Toplane Zenica, te da je Nova Željezara u odnosu na snabdijevanje društva Dobojuputevi d.d. Doboju Jug ponudila Energoinvestu mogućnost dogovora, čemu je preduslov bio Energoinvestov pismeni zahtjev, koji prema Novoj Željezari Energoinvest naposljetku nikad nije uputio. Ovo se ne može okvalifikovati drugačije nego kao lažna prijava i nezakoniti oblik pritiska na većinskog vlasnika i direktora Nove Željezare, s ciljem da se isti destabilizira, zaplaši i onemogući u ostvarivanju svojih zakonitih prava. Korištenje krivičnog prava, i to instituta terorizma - jednog od najtežih krivičnih djela - kao instrumenta ekonomskog i poslovnog pritiska, predstavlja zloupotrebu krivičnog prava i takvo postupanje može rezultirati odgovornošću inicijatora takve aktivnosti.

Ukoliko Prijedlog Zakona bude usvojen od strane Parlamenta FBiH, H&P će bez odlaganja pokrenuti sve raspoložive pravne postupke za naknadu prouzrokovane štete pred nadležnim tijelima. Visina štete bit će precizno utvrđena od strane sudskog vještaka ekonomske struke, na osnovu podataka o umanjenju stečajne mase Nove Željezare usljed nezakonitog prekida tekućeg stečajnog postupka te otvaranja i trajanja vanredne uprave, podataka o umanjenju vrijednosti imovine Nove Željezare prouzrokovanom zahvatima vanredne uprave, podataka o izgubljenoj dobiti, prouzrokovanim operativnim gubicima i narušavanju prava povjerilaca, te svih drugih relevantnih ekonomskih pokazatelja koji će ukazati na ukupno umanjenje imovine i prava H&P-a i drugih povjerilaca. Prema preliminarnoj procjeni, šteta će iznositi stotine miliona konvertibilnih maraka. Za ovu štetu punu pravnu i materijalnu odgovornost snosi Vlada FBiH, a u konačnici i Federacija BiH, čiji su budžetski i drugi resursi izloženi riziku koji je isključivo posljedica neustavnog i nezakonitog djelovanja njenih organa vlasti.

U odnosu na zaštitu svojih prava po predmetnoj materiji pred inostranim sudovima i tijelima, H&P je već angažovao jednu od vodećih globalnih advokatskih firmi.


Na osnovu svega navedenog, pozivamo Vladu FBiH da odmah i bezuslovno prestane s neustavnim aktivnostima usmjerenim na ograničavanje ili oduzimanje vlasničkih i upravljačkih

prava H&P-a, da povuče Prijedlog Zakona te da pristupi dijalogu u dobroj vjeri radi pronalaska zakonskog i ustavnog rješenja koje poštuje vlasnička prava i interese svih strana.

Ukoliko Prijedlog Zakona bude usvojen, ili ukoliko Vlada FBiH nastavi s neustavnim aktivnostima opisanim u ovom dopisu, H&P će bez daljnjih upozorenja i bez ikakvih odlaganja aktivirati sve raspoložive pravne instrumente domaćeg i međunarodnog prava s ciljem zaštite svojih prava i potpune naknade prouzrokovane štete za koju će se teretiti Federacija BiH. Svu pravnu, materijalnu i političku odgovornost za nastale posljedice u tom slučaju snosi Vlada FBiH, odnosno Federacija BiH.

H&P će u punoj mjeri u kojoj to zakon dozvoljava preduzeti sve pravne instrumente i mjere protiv predlagatelja ovog zakona, budući da predlagatelj postupa s očiglednom namjerom uskraćivanja prava koja su H&P-u zagarantovana Ustavom i Evropskom konvencijom.

S poštovanjem,


Advokat
Suad Slipičević, advokat
Zmaja od Bosne 7-7A, Sarajevo

Prilog:

— *Punomoć za zastupanje.*

